

52221.

disce 1722

OPUSCOLI DELLA « SOCIETÀ FILOLOGICA FRIULANA »
N. 9

UGO PELLIS

CATINUTA

Pa fiesta in onór da contessa CATARINA PERCUDÀ a San Lorènz di Soles'cian
ai 3 di setembar 1922



UDINE
SOCIETÀ FILOLOGICA FRIULANA
1922




OPUSCOLI DELLA « SOCIETÀ FILOLOGICA FRIULANA »
N. 9

UGO PELLIS

CATINUTA

Pa fiesta in onór da contessa CATARINA PERCUDA a San Lorènz di Soles'cian
ai 3 di setembar 1922



UDINE
SOCIETÀ FILOLOGICA FRIULANA
1922

'A era 'na volta una fruta che veva non Catina. 'A era nassuda quant che un uminùt, di buna razza, doventàt imperatòr, al lava via pal mont sul so ciavàl blanc e duc' s'inzenoglavìn co 'l passava. Catinuta 'a era anciamò pizzinina che jé vignuda par dut una granda ciaristia, una fan tramenda, che la int 'a doveva mangià arba e ladris par no muri. Ma je 'a era fia di int che stava ben e par chist 'a no à patit. So pari, che 'l veva anciamò sis fruz, al gi oreva un ben di vita a la so Catinuta e la menava fur pai ciamps di matina co 'l cricava 'l di par mostrági zimùt che 'l si dismòf al mont e zimùt che 'l jeva 'l soreli daùr da monz. Dovès savé che 'l pais là che era nassuda ché fruta, al era in planura, justa parmis da culinis che daùr a' an montagnonis altis altis.

E' passavin, e passin anciamò avuè, par dōngia di chel bocòn di tiara doi fluns granc' che savoltin tanta glèria e sbusin e strissinin via mulins quant che plof 'na vora.

Catinuta 'a lava via pai ciamps e pai rivaì e pai praz duc' plens di rosis e rusutis di tanc' colòrs, e si la gioldeva a stà a sinti a zornà i uzzilùz, gi coreva daùr a li paveis e zuiava cui cians e ju batìava Fido, Bibis, Furò.

Co era straca, 'a si distirava ta ombrena dai pòe e dai moràrs, se 'l era cialt, e stava a sinti li zianis ta pàs dal misdi, o si sintava dōngia una rissultiva che ciacazzava vignint fur dal cret.

Di sera 'a gi plaseva a stà pogneta ta arba e cialà li stelis che miàrs a 'simiavin in zil, e scoltava la filulela dai grii che sunin un viuin che 'l à dome 'l cantia. E po a gi faseva via pal di visitis a la clòcia co covava i pulizzùz, e gi buttava di mangià a li gialinis, e curuzzava

di cà e di là pa ciasa, e sbisiava par dut. E zuiava cu li so amiis, che erin dutis fiis di contadins.

Cussi Catinuta 'a vigniva sù legra, sana, contenta, e gi pareva che no pòdevin séi in chist mont pais plui bieì dal so e plui buna int di ché da so bandis.

E tal so pizzul zarviel 'a ingrumava dut chel che vedeva di biel e di bon intòr di sè, e 'l so cur al si sgionfava di speranzais e di suns bieì, colòr di rosa come li pichis da monz dal so pais quant che 'l soreli li indora.

Ma quant che je mancùl si la spieta, 'a gi mûr so pari, e 'l serèn da so vita 'al scomenza a inulási. Catinuta, desperada, a va via pai ciamps vaìnt, 'a riva ta 'na boscheta di pòe sot da mont e va indenànt e va indenànt senza savé dulà. 'A ti càpita cussi denànt di una grotta e va drenti par polsà. Tal cret 'a era una sclapadura toronda e vigniva fur spissulànt un fil di aga che 'l colava sui clas e pareva che 'l fevelàs; ma pròpria, saveso, come che 'l vès vut la peraula. La Catinuta 'a poia 'l c'af su' cret e gi pâr che la rissultiva 'a gi disi: «Vai, vai, vai...». E in man in man che je vai, gi pâr che 'l sglunfiduìn dal so cûr al si disfanti.

Dopo d'in ché di la Catinuta a va dapsés e sintí la rissultiva che, murmuànt cun ché so strana vòs, 'a ven fur da vissaris da tiara e la cunfuarta e gi fas ben.

Una di so mari 'a gi di: «Sint, Catinuta, tu no tu podis restà simpri culi cui contadins. Bisugna che tu ledis in zitât a studià».

Catinuta 'a resta ingusida, un pòc dal plasé di là a viodì la zitât, ma plui dal dis-

plase di lassà i so ciamps. Al cur al gi dà che ta zitàt 'a no ciatarà nuia di bon — Sot sera 'a va via pa boscheta e si ferma là da rissultiva. A' tant tarment che jé straca e no pól stá plu in pins. L'aga 'a svuata via par enfra dai clas, e Catinuta, cul cûr ingropât, 'a si poia sul cret e si inzechis: no duar e no jé sveada.

Dut t'un bot gi pâ che fur di ché busa toronda da rissultiva 'a vegni fur una biela fantata cui vôi zelestons come 'l zil, cui ciavei ariôs che parin spics di formènt faz sù in strezza, e cun t'un vistit lunc colôr cafè, dut guarnit cun fueis di vit fatis di smerâlz e cun raps di ua faz di rubins, e tal miez sparnizzâ di cà e di là diamanz grues faz come grans di blava e fasui. La Catinuta la ciala e resta cu' la bòcia viarta.

Ché biela fantata 'a riduzza, i poia una man sul ciap a la Catinuta e gi dis: « Brava, Catinuta, tu tu vegnis simpri a ciatâmi. Grazis, benedota, che tu mi ulis ben, ància jo ti vuci ben. Son tant pòs chei che scoltin la me vòs ».

Catinuta, senza vé fregul di paûra, 'a gi dis: « Cui sestu tu? » — « Jo sói la rigina da aganis, Catinuta ». — « Sestu tu che tu mi ciacâris simpri ta l'aga dal cret? ». — « Sì, Catinuta, jo e dutis li mes aganis » — « E ze fastu culi? » — « Ciala », gi dis la rigina da aganis e fas come una gardela cui dez da mans che erin tant bielîs, « jo filtri 'l dolôr dal mont e meti a suiâ li piezzis che son imbumbidis di làgrimis. Viodistu zimût che saltin ché goti gruessis che lusin come perlis? Ben, Catinuta, chistis son li làgrimis da int dal mont che, saltuzzànt di clap in clap a' sglinghinin e fasin ché musica che ti plas tant a ti e che tu ses vignuda a sinti tanti voltis. « Va là che tu às di là, e quant che 'l cûr al ti sponz, recuârditi da to amia ».

Catinuta 'a sbat i voi, 'a ju sfregola, gi pâ di dismóvisi di un sun...

Pòc timp dopo 'a jé in zitât e ciamina par enfra di tanti ciasis, grandis, una dongia l'atra, che siarin li stradis di cà e di là, e finis par rivâ in t'un grant casament cun tanti ciâmaris. E drenti a' stan tanti frutis come je, e zuin e saltin e studiin e prein. Gi si ingropa 'l cur, gi

ven di vaî a viódisi siarada, ma scûin restâ.

'A resta alî diviars ains: 'a studia, 'a prea, 'a impara a fevelâ atri lenghis e a fá bieî lavòrs; 'a doventa una brava fantazzuta. Ma si sint simpri come leada 'tor dal stomi. Ah, ze tormènt a no viodi mai a jevâ soreli da zima da so culinîs, no podé gioldi la libertât dai so ciamps benedéz, viódisi simpri denànt dai voi ché musis rassegnadis da buni muinîs, senza colôr, fredis, che parin ciandelis di zera che si cunsumin su l'altâr dal sacrifici. Catinuta, di vivarosa ché era, à scomenzâ a fâsi plu sèria e pinsirosa. Ché vita no era fata par je: gi sfracuiva la so ànima.

E cussi, un an daûr chel atri, Catinuta 'a era doventada una fantazzuta e sintiva za tal so cûr poleâ la vita. Tanti voltis, co leeve puisîs e libris che contavin storiis di amôr, 'a ansava e sustava, e gi vignivin li làgrimis tai voi a sinti contâ la vita di prinzipessis bunis e disfortunadis, come che in ché volta 'a si usava a scrivi. Ancia Catinuta bramava tant qualchidun che 'l gi orés ben; no gi impuartava che 'l fos un cont o un prinzip, ma che 'l gi orés ben, tant ben, parzé che je si sintiva cussi sola là drenti e bramava tant qualchidun che la capis, che la menâs via da zitât, che 'l fos so amî par duta la vita, tal miez dai ciamps che sverdein ogni an.

Tanti voltis, co no podeva durmî, je si figurava chist on come un biel fantât riz-zòt, biont, cui bafûz frescs e 'l volî colôr dal zil. Lui la tigniva par man, e duc' i doi a' lavin via par un zardin dut plen di rosis, di rosis di ogni colôr, che nulivin tant di bon; li ciarandis di lunc dai trois erin dutis un gran mazzèt di rusuti blancis che scundeivin li spinis. E lavin via, lavin via, un dongia l'atri, senza mai inzopedâsi, disinsi bieî peraulutis e cialansi tai voi. E rivavin t'un ciântunût dulà che era una piârgula, e in somp da piârgula 'l era un gran tei, e daûr dal tei una ciasuta biela, blância, plena di soreli e di ligria. E je poiava 'l ciap su la spala dal zovin

e s'indurmidiva contenta. Ma a la matina 'a si ciatava bessola.

Qualchi gnot 'a lava plui in là: rivava ta ciasuta, ta so ciasuta, e gi pareva di jessi plui viela, si vedeva curuzzà intòr doi frutùz, i sioi frutùz, nassùz da so vis-saris; po dopo lor a' si sintavin sui zenoi di «lui» che 'l era sintàt dōngia 'l fogolàr sot da napa e ju faseva saltà e gi ciantava: «Ghigghi, ghigghi, ciavàl...».

E je 'a tigniva tal braz una frututa duta rizzota come lui e gi dava di teta. E lui la cialava: li sflamiadis da fassinis la inluminavin duta, e lui al gi riduzzava e 'l gi diseva cun t'una vòs cussi buna e cussi dolza: «Catinuta, 'a tu ses plui biela da Madona».

E la frutata 'a si dismoveva cul paradis tal cùr.

E lui, chel zovin tant bramàt e suspiràt, una di al càpita sul sèrio. Catinuta no sa ze di, no sa ze fà, 'a jé duta confusio-nada; e za la prima volta che lu viot 'a si sint duta l'ànima plena di un plasé che no 'l à non.

Dùncia dut chel che je 'a veva vidùt in sun al sarà veretàt, al sarà propi cussi? O, ze biela che jé la vita: orési ben, lavorà cu la contentezza tal cùr, ta granda ciasa tal miez dai ciamps, plena di fruz e di ligria e di salut!

A Catinuta gi ven squasi paùra di jessi tant contenta.

E veva resón. Una gnot gi pâr di là via pal zardin cul so moròs.

Lui no la cocola plui, squasi nància no la ciala. Dut t'un bot al fas un salt di là di un grant fossàl, al gi volta la schena e via lui, bessól. Je 'a resta come inmatunida, va indenànt come che fos 'na mà-chigna e viot li ciarandis zenza rosis, dome cu li spinis; e la so ciasa 'a jé plena di fruz che no son sioi; 'a cor tal ciamp, lu viot lui di là dal flun che 'l rit cun t'un'atrà; 'a dà 'na ucada e si dismòf.

Poc timp dopo, chist sun al é veretàt.

La Catinuta che veva urùt ben cun duta l'ànima, come che si u ben una volta sola ta vita, à bramàt inalore di murì, di finila cun chist mont trist. E à bandonàt la zitàt e jé tornada a ciasa so, e veva una gran disperazion tal cùr. Co era sola,

'a vaiva par sfogà la so pùara ànima imbumbida di dolór.

Inalore 'a si recuarda da rigina da aganis e va ta grota sot da mont. L'aga che coreva fur di chel gran voli secur sgiavàt tal cret come t'una granda crepa, a svuata-tara tai clas come ains fa e pâr che disi: «vai, vai...», istès d'in ché volta.

E alora Catinuta 'a fas come che gi veva insegnati la rigina: 'a beif tre glutàrs di aga e dis tre voltis:

«Agana, biela agana,
ven fur di sta fontana».

E subita la rigina da aganis 'a sta denànt da Catinuta e la ciala fissa tai voi che vain e gi met una man sul sen, una di ché bieli mans che filtrin al dolór dal mont.

«Catinuta», gi dis je cun t'una vòs tant buna, «Catinuta, tu tu bramis di murì. Tu no tu gi ulis plui ben a la vita, a to mari, a la to int, al to país; tu tu bramaressis che 'l cur al ti si scelpàs, parzè che 'l displasé al è tant grant che no tu ti sintis di sapuartàlu. Ti pâr che no 'l puedi esisti plui un plasé in chist mont. Ben, Catinuta, fas chel che ti disi jo e tu ciataràs una contentezza plui biela di ché che ti podeva dá al to amór».

Catinuta 'a si met cul ciáf a pendolón. La rigina da aganis 'a capis che la frutata no gi cròt, e gi dis: «Catinuta, par vuarì... par vuarì dal to mal, tu devis prima di dut lei chise' tre libris: un al ti dirà la paraula da veretàt eternis, al scònt la bellezza da vita dai ciamps, al tiarz al ti mostrerà l'unfiar da passions, la bellezza dal sacrifici che 'l fas pura e lampa-pida l'ànima, e la pàs santa che si ciata cul distacási di dut chel che nus lea cul mont».

Catinuta 'a torna a ciasa simpri cu la so indea fissa che dut al è finit par je in chist mont. Un pòc in di 'a si met a léi come che gi veva diti la rigina da aganis. E come un balsim li peraulis da puisia e da bellezza e da veretàt a' passin su la plaia dal so cùr. E 'l cùr al scomenza a calmási.

Una di 'a va a ciatà la agana, e la agana gi poia li mans sul ciáf e gi slissa i ciavei. Catinuta 'a sint un sgrisulón co-

me se jù pa schena 'a gi corés jù aga inglazzada. La agana 'a met la man ta chel gran voli neri tal cret e 'a tira fur un spìeli.

« Cìò, Catinuta », i dis, « parta a ciasa chist spìeli, e quant che ti ven la malincunia, digi: — Spìeli, spìelùt — che tu viodis par dut — mòstrimi 'l biel — mòstrimi 'l brut. — Ma dopo, Catinuta, tu mi contarà ze che tu às vidùt ».

Catinuta 'a ciala 'l spìeli, lu volta e lu zira: al è un biel spìeli torònt, di cristàl, cul mani di arìnt. 'A lu parta a ciasa e lu met tal scrin.

Una dì che si sintiva tanta voia di vai 'a va ta ciàmara, 'a ciol al spìeli e gi dis: « Spìeli, spìelùt — che tu viodis par dut — mòstrimi 'l biel — mòstrimi 'l brut ».

E la Catinuta 'a resta je, a viodù tal spìeli int che si mòf. Un pòc a la volta 'a capis che 'l spìeli al gi conta una stòria. È un'atra di un'atra stòria. È cussì ogni volta un'atra, ma che gi samea.

Dopo un pu di timp 'a va là da agana, e la agana a si fas contà li storis, e je che sa dut, a gi dis ància i nons di ché int:

Eco la siora nòbila che càpita in t'una ciasa di contadins, e cròt di gnot di viodi in sun al so prin e unic amòr, ma un pòc a la volta chel fantàt, di biel che 'l è, al doventa un schèletro. Tal domàn je 'a pensa di ciatà un pu di cunfuart col judà un frut vuarfin che 'l à piardùt so mari la sera prima. — Eco la stòria di un'atra fèmina che si cunsuma senza amòr e senza famea so, in t'un convènt, e pensa dome a fá dal ben. « 'A si clama suor Maria Eletta », 'a dis la agana.

Eco la stòria da Brigida, che par colpa dai atris 'a sarà disfortunada par simpri, e che si cunsuma e fas fenta di sei alegra e contenta.

Eco la Maria, che piart al so ben, la so fruta, e 'a siara 'l dolór tal so cùr e squasi 'a sint un cunfuart a tormentàsi zidina zidina, a tocià la plaia dal so cùr e fála butà sanc.

Eco un'atra anciamò: la fraile Cati, che no cròt di podé gioldi plui che in sun, che par je al val plui da realtà, parzè che veva ürùt ben come che si ul ben una

volta sola ta vita. E dopo je no à pensàt a atris che a fá dal ben a duc', e cul fá dal ben 'a ja ciatàt al rimiedi pal so mal e jé tornada a vivi tal ben che gi faseva ai atris: era l'agnul che 'l lava simpri a consolà dulà che si scugniva suia una làgrima.

Eco presentàsi tal spìeli la contessa Eleanora che veva provàt un gran dolór e che no gi dà plui un solt da vita, e siara al so dolór strent tal sen, rassegnada, quieta. Ancia je 'a ciata cunfuart, tal jessi di aiùt ai atris e compatis duc'.

E po dopo si viot Miute, che jé malada e patis tanc' ain senza mai lementàsi e pal ben dal so omp a orarés che lui al ciolés un'atra, e che je a' làs a polsà sot tiara par no jéssigi di peso.

Eco la stòria di chel pùar pastòr doventàt mat par amòr, che sunànt al flaut al sfoga al so dolór che no 'l varà fin.

Eco Pre Pòc, che par vuarì dal so lancùr al tormenta 'l so cuarp e 'l vif dome pai atris.

« Brava, Catinuta, » 'a dis la rigina da aganis, « tu contis ben chel che tu às vidùt. È capissistu ància ze che ulin di chisti toris ? »

« Mi pâr di sì », 'a rispùnt la Catinuta, « mi insegnin che bisugna imparà a rinunzià, a fá di mancùl di un ben che no 'l é destinàt par nò; che, tal dolór, bisugna zirì un plasé che no 'l à non, che 'l à ale di sant: al plasé di gioldi dal ben che si gi fas ai atris ».

« Va ben », gi dis la agana.

« Ma spièghimi, rigina », gi dis la Catinuta, « parzè àno dutis chisti fèminis e ància i ùmins che viodi tal spìeli una musa che mi samea tant a mi »?

« Dut chel che tu viodis, Catinuta », 'a dis la agana, « tu tu lo viodis dome cui to vôi e tu sintis tal to cùr dome chel che 'l é intonàt su li cuardis da to ànima. Par chist, ància, tu che tu às vaiùt tant a tu capissis tant ben li làgrimis dai atris. È cussì tu contis dut sanzira e scleta, e si viot che 'l cùr al ti sbat tal cuel come che tu contassis la to stòria. Ma cumò tu podis tornàmi 'l spìeli. Cìò chist culi che 'l à la curnis di rôl e 'l mani di fiar fat come un coltri di varsór. »

E li aganis a' si tacin a balà la stica intòr da Catinuta e ciantin:

« Cul coltri tain la tiara;
samenin al formènt;
tal cùr dolòrs sesolin
i spics di un gran tormènt. »

E la rìgine da aganis che saveva dut, a gi dis a la Catinuta: « Pensa, benedeta, che la vita 'a no jé un sun, la vita jé un dovè. Se tu fossis lada a sapuliti in t'un convènt, ze sarèssia stat di to mari che jé malazzada? Dutis ti preieris da muinis no valin tant come ches di to mari. Tu ciataràs instès la pàs. E po tu às tanc' nevòz in ciasa. Vif pal ben di lor e da buna int dal to país. Nissùn no l' devi stà dibànt, parzè che duc' a' àn alc ze fà in chist mont; nància i baràz da ciarandis a' no son staz faz par dibànt. Si scüin judàs un cun l'atri.

Bisugna sarvi par alc, jessi üti. La vita no jé un sun, a jé un doyè. Tu ses furlana, e tu devis capìmi. Cui che no 'l si avilis, al sùpera duc' i mai. Dismentea la zitàt cu la so tristèria, e resta simpri cun chista buna int che gi ul ben a la tiara ».

« Ma jo doventarai una vedrana, e duc' mi ridaràn daür ».

« Nò, Catinuta, bisugna che tu ziris di bastà a te stessa. Fas in müt di pensà e di viodi la vita come che tu üs tu. Una fèmina che pensa cul so ciàf no pól impastà 'l so zarviel cun t'un atri; no pól adatàsi a cioli sù li impunions e li usanzis di un atri; no pól nància partà 'l non di un atri. »...

Lant a ciasa Catinuta 'a masenava tal so ciàf chei pinsìr jusc', ma tant amàrs, e 'l cùr col so toc-toc al pareva che 'l disés anciamò: La vita é un sun, la vita é un sun... E la so ànima 'a lava incuntra a un'atra ànima, e un ciàf che jé gi oreva tant ben e che no veva pudùt strenzi tai so braz, al si poiava sul so cùr... E come un solc scur a gi é restati fra li zearis par duta la vita: alc là via lontàn lontàn on al faseva colà ali la so ombrena.

Ma d'in ché di la Catinuta 'a si à sin-tùt cressi l'ànima come se Diu la ves mituda jé par timón da famea che lava

malamentri indenànt. 'A si à mitùt a fá li voris di ciasa, a direzi i lavòrs tai ciamps, tal ort, ta stala, tal pulinàr, ta ciàniva e sul ciast plen di cavalìrs. E sfadiava di e gnot pal ben dai atris, come una contadina, je che era contessa.

Ma plui di una volta la tampièta e 'l sec e la zilugna tai ciamps e li malatiis e li disgrazis in ciasa e ta stalis a' distruzevin al so lavór. Je si faseva coràgio, ma qualche zornada 'a no podeva plui e 'a lava daür ai pinsìrs trise' e vaiva, parzè che gi vigniva sù dut l'amàr da so pùara vita di rimit e gi intosseava 'l cùr. Allora je 'a ciapava in man al spieli da agana che 'l veva 'l mani come 'l coltri dal var-sòr che 'l sclapa la tiara, e diseva: « Spieli, biel spieli, — mòstrimi 'l soreli; — sói duta t'un nùl, — no ti fàsiò dül? »

E 'l spieli allora 'l gi mostrava la stòria di dona Mènia Durlia, di dona Màssima Martelossa e da brava Nuta, duti fèminis di coràgio, ben plantadis, che parevin fatis di ròl e no si stracavin mai di lavorà pal ben da famea.

E 'l spieli 'l gi presentava Blàs, al fàtòr innamoràt da tiara, che 'l ul che i so fioi a' doventin bràs contadins e nò misars impiegàz, e che cul cùr ingropàt al gi dis a un disgraziat che no 'l oreva fá dal ben: « Vò no gi orès plui ben ai vuestris ciamps ».

E 'l spieli 'l gi meteva sot i vòl al bràf pussidènt in tal an da fan e la brava siora che no ul che 'l so on al fedì fá lavòrs tal zardìn dome par biel viodi, ma che 'l fei lavorà ta ciasis dai pùars sòtans dutis discredilidis.

E Catinuta 'a viot tal spieli chè malarana di contessa Ardèmia della Rovere che, disgustada da confusion e da falsetà da vita zitadina, 'a va a stabilisi in campagna par fá lavorà ben la so passion, e doventa la binidizion da pùara int, cun dut che so agna, la gran dama da cròs cu' la stela, 'a faseva 'l ciadaldiau.

E Catinuta 'a viot tal spieli chel bon omp di Svuolt che 'l é tacàt cun duta l'ànima a li so monz come 'l pin tal cret e po dopo Adilina, la gnezza dal plevàn, che no pól stà di là da monz, lontana da so int.

E atris storis anciamò 'a viot Catinuta,

instoris di int pusitiva che à i pis discòlz, ma pastanàz ta realtât da vita come li ladris dal noiâr ta tiara dura, di int che gi ul ben al so pais cun dut che 'l è pûar, tormentât e disfurnât.

E Catinuta à sintût a fâsi simpri plui fuart chel afiet pal so pais che gi veva insegnât so pari. A' capit in allora duta la bellezza da so tiara, à sintût duta la puisia che sta ta sani usanzis dal popul che 'l vif tal àiar libar e pur dai ciamps, e à viart ben ben i voi par cialâsi intôr. E gi à urutî simpri plui ben a la int che lavora la tiara; e i contadins àn dismenteât la diferenza che era tra lor e la buna contessa e son doventâz soi amis sanzirs.

Je si sintiva ben tal miez da pûari fêminis in glêsia co preavin al rosari da Madona, 'a lava vultintir a gnozzis là di qualunque, 'a tigniva daspès a batiâ, faseva 'l licóf e li mirindis, 'a ciacarava dôngia 'l poz e ciantava li vilotis che gi plasevin tant, 'a lava a li sagris e ta filis e ai perdóns tai santuaris su li monz o ta laguna, e cu' la ciandela in man 'a lava a preâ 'l Signór in purzission, e passava oris e oris, dôngia 'l jet dai malâz e faseva di dut par judâiu, parsin 'a dissegnava pipins par divertî qualchi malada.

E fevelava cun duc' ta chel lengâz antic che 'l sta sul fonz da l'ànima da so int e 'l sa di duta la bellezza e la bontât da so tiara.

Cussi la Catinuta 'a veva dismenteât par simpri la zitât e i so custûms e si veva leât simpri plui stenta 'tor da pûara int che lavora, patis e tât. E lor gi orevin ben come a una mari.

Una gnot di San Zuan, Catinuta 'a jé lada a ciatâ la rigina da aganis e gi à partati indaûr al spieli e gi à contati dut chel che veva vidût e provât. E la rigina da aganis gi dà una bussada e la ciala fissa tai voi; po dopo 'a slârgia la man gestra e i zinc dez di ché biela man che filtra 'l dolôr dal mont, a' parin li zinc pontis di una stela. La agana 'a gi met la man sul cûr e gi lassa un segno come una stela di zinc pontis. Catinuta 'a ansa, 'a ansa e ciala fis. 'A sint un gran fracàs,

un ciadaldiau: fêminis e fruz che sberlin, e po dopo blestemis in t'un lengâz di salvadis, e po dopo ciavai che corin e fan tramà la tiara. A' un sbusinor ta orelis che la sturnis. 'A sint un odôr di brusât e viot un, doi, tre pais che brusin e la int che s'ciampa mieza nuda, e po dopo bruz soldâz che robin di cà, che rompin di là, che mazzin i malâz e strissinin via i sans. Chei bruz mostros gi giavin i voi ai sanz, a' butin ledàn sui ortârs, a' sfilzin i fruz ta scuna e tratin li fêminis come ciâr vinduda. E Catinuta 'a sint tonâ 'l canón e viot li micis da bombis che plombin ta una fuartezza che à sul ciampanili dal domo i tre bieci colôrs da so pàtria.

'A si sint tramà i zenoi e si met a vaî.

Alora la rigina da aganis 'a fas tre torondei cu la man, un blanc, un ros e un vert, e dis: « Ciala, Catinuta, chista a jé la *Rusina di Osóf* ».

E Catinuta 'a viot una fêmina duta patida che lassa a ciasa doi fruz plens di fan, e va via di gnot cul stratimp, traviars di un bosc par passâ par enfra da sintinelis che stan intôr dal so pais e ulin fâ murî duc' di fan. Dut t'un bot si sint una peraolata t'un brut lengâz e subita dopo una sclopetada: la pûara mari 'a cola par tiara cul zarneli sclapât.

« Ciala », a dis la agana, « chisc' a' son 'Sifût e Angilina ».

E Catinuta 'a viot una fêmina, duta spiziar che, dopo che in zitât al si veva dismenteât da famea e di dut, al ciata una frutata che si clama Angilina, e jé propri un agnul. Quant che stan par jessi contênz, ché bruta gernâzzia che fasevin i paróns ta chel pais a' ciatin fur che Angilina 'a veva mitût devânt da Madona una rama di galeta con tre floes, un ros, un blanc e un vert; la ciapin e tal miez da piazza, fra do filis di baionetis, la batin zenza misericórdia cul bostón. Sifût, a viodi zimût che jé tratada la int dal so pais, al va soldât dai tre colôrs, par svindicâsi e liberâ la so int o murî.

Po dopo Catinuta a viot passâ i pûars *brusâs di Almùc* che, restâz zenza nuia, àn anciamò fede tal Signór e partin in purzission pal pais brusât la Madona e i sanz brustulâz che vevin salvât da flamis.

Po dopo 'a viot la stòria dal *soldàt forèst*, maludit di Diu, che 'l veva fat i bez cu' la vuera, ma i bez faz sù cul sanc da pùara int a' no gi fan bon pro, e no 'l à pàs nància dopo muart.

E dopo 'a viot la stòria di ché *fantaz-zata* che balava cui soldàz foresc' e jé muarta maludida dal Signór.

E viot dopo un *soldàt dal so país* che no 'l ciatarà pàs e 'l zirarà atòr pai praz fin che no sarà liberada la so pàtria.

Catinuta 'a cola in zenoglón: 'a viot passà duc' chei bieci zovins che erin muarz par fá unida a libara la pàtria, e sint che disin: « Noatris vin scombatùt pa libertàt. Noatris a sin contènz di essi muarz pa l'Italia. Prea, prea che 'l nestri sanc no 'l vedi di sèi spandùt dibànt. Prea che chei che vegnaràn dopo di nó a' vegnin sù boins e fuarz e che puedin liberá la nestra tiara ».

E Catinuta à sintùt alora ingrumási tal so cùr duta la fuarza da so pùara nazione e à preat vaint che la so pàtria a podés rassisti e superá 'l gran nimí che come l'orcul al tentava di sfracaiála sot' j so telóns.

E dopo 'a gi domanda a la rigina da aganis: « Zimùt puédio fá alc pal me país tant tribulàt? ».

E la rigina da aganis a gi dis: « Scolta ché vòs che ti fevela di lontàn, di una zitàt sul mar; jé la vòs di un on che tu no tu cognossis, ma che 'l doventarà to grant amì come un to fradì ».

E la vòs lontana 'a diseva: « No sta jessi cussi spaurosa. Scrif. Noatris cà ta zitàt sul mar a' vin un sfuci che 'l manda *falis'eis* di pinsir e di afiét. Ciàliti intòr di te. Ciala ta to ànima che jé tant biela e plena di pinsirs boins. Tu tu cognossis la to int e 'l to país. Scrif. Bisugna che duta l'Italia lu cognossi. Còntinus li belezis dal to país, còntinus i custùms e li bunì usanzis, còntinus i lavòrs da so int, i divertimènz e i sioi dolòrs ».

E Catinuta, par podé fá dal ben, si à tacat a scrivi li stòris che veva vidùt e sintùt, e cialànt cui sioi voi pinsiròs à copiat dal ver la vita dai pùars, à dissegnànt in tanc' quadrùz li belezis dal so país, che 'l si spiela ta so sturiutis come li plantis e li rosis dai rivali ta aza lèmpida da rois quietis e fondis.

E duc' chei che leevin ches stòris a' si maraveavin. Un vieli cun t'una barba lùngia che 'l stava t'una zitàt maraveosa crissuda sù da ondís dal mar, al è restàt a sinti ché vòs dolza e sanzira e scleta, ingropada di làgrimis, che vigniva jù pa laguna.

Al era un vieli nassùt t'una tiara, im-bumbida di dolór, che si cunsuma anciamò di amór pa l'Italia. Lui al à vidùt al ben che podevin fá ches stòris di Catinuta, cun dut che vevin difiez, lis à leadis e lis à mandadis jù jù par duta l'Italia.

E la contessa contadina che si platava fra i pòi e i moràrs dal so país, à sintùt tanti vòs che vignivin sù di ogni banda e la laudavin e la binidivin. E tanc' a' gi scrivevin che orevin viòdila e cognòssila. Ma je 'a lassava malvulintir al so nit e stava via mancùl che podeva. Era come una planta che no sta ben che ta so tiara là che jé nessuda e no si pól traplantála. 'A no à urùt lassálu nància quant che ché bruta gialinata cun doi bècs che era parona dal so país, à manciat pòc che no la sgrafàs e che no i giavàs i voi par via da stòria da Rusina di Osóf.

'A scriveva Catinuta ta lenga di duta la nazione, ma si sintiva che veva ta orelis al lengàz dai contadins dal so país. E pluì di una volta gi sbrissava la pena che lava a tociá ta aghi curintis dal fevelá da so tiara. Qualchidùn gi lu à diti, e ància cun pòcia buna maniera. E alora je 'a tentava di taponá li cumissuris cun qualche pinelada di toscàn, e faseva piès.

La buna agana alora gi à conseati di scrivi come che veva simpri fevelàt di pizzula in sù. E alora si che gi menava di gust, tal lengàz da so int, e squasi mai 'a no lava fur dal troi just. Cussi à pudùt presentá a l'Itàlia al so pùar país ta so flusumia rùspia e dura e pinsirosa, ma buna e sana.

Una di la agana so amia, che je simpri 'a lava a ciatá, 'a gi dis: « Sint, Catinuta, tu às scrit tant pai granc', scrif ància alc pai fruz e pa frutis ».

E Catinuta, ubidienta a ché vòs che vigniva da vissaris da so tiara, à fat un biel mazzèt di parigins, ju à leàz cun t'un *recam* e ju à mandàz a duti li bunì fru-

tis. E li frutis, ze tanti frutis!, son dovendis sos amiis. E cussi Catinuta, che era zaromai grisa, 'a si vedeva 'tor di sè come una ghirlanda di rosi fres'cis: la Gigiuta, la Nena, la Costanza, l'Aldina, la Silviuta, la Catina, la Giulia e tanti e tanti atris, e dutis s'ciassavin al biel cial cial rizzòt e la cialavin cui voi birichins e lustris.

E inalora Catinuta à sintùt ché contentezza che no à non e no à fin: la contentezza che una mari 'a sint cialànt li sos creaturis rilevadis bielis e bunis, e che je 'a no veva pudùt vé ta so zovintùt. E dut chist amór al gi infassava li plais antighis da so ànima e i dolòrs dal so cuarp tormentàt di un mal che no i dava rèquie.

Ma atris grandis contentezis al era di just che provàs la Catinuta: la gialinata cun doi bècs che sghitiava al zardìn dal mont, una di 'a jé stada sfolmenada fur dal país; nò tant lontàn come che varés duvùt là, ma intànt Catinuta 'a era fur da so sgrifis.

E pos ains dopo Catinuta à pudùt gioldi anciamò quant che Roma 'a jé tornada a jessi la capitàl da l'Itàlia, di ché Itàlia che je e Checo e Pacific e i sioi amis, za tanc' e tanc' ains prima, a' vevin clamàt e tant bramàt, e che una di che sei lor a' crevin che vés vut di largià li àlis da so vitòria fintinamai su dutis li crestis da monz che cialin jù tai nestrìs ciamps.

E l'Itàlia, vignuda tal so país, si à recuardàt di dut al ben che la Catinuta 'a veva fat e la à onorada come che meretava.

'A era una biela gnot di avost diviars ains fa quant che Catinuta poiànt al cial sul braz di so gnezza Giulia, à siaràt i voi e si é indurmidida par simpri. Je varés urùt polsà i so vues stracs ta tiara che je gi veva uruti tant ben, dōngia dai pùars che erin staz i sioi amis, i sioi fradis. Ma invezì la àn partada in t'una zitàt, par che no restàs dismenteada tal miez dai ciamps. Ma quant che jé capitada là, nissuna siora no gi é vignuda incuntra, e alora l'ànima di Catinuta 'a si

à ciapàt sù e jé tornada là da aganis, e à poiàt al so cial gris sul grin da rigina. E la rigina da aganis a gi à mituti una da so bieli man che filtrin al dolór dal mont, su li palperis dai voi e ché atra come una stela di zinc pontis sul so cur. E l'ànima di Catinuta si à sintùt come in paradìs.

Passa un air daür chel atri e i amis e li amiis di Catinuta a' van simpri al mancul. E ància ché di che doveva fá l'Itàlia duta intira, ché di che Catinuta 'a veva tant bramàt e no era rivada a viodi, 'a pareva che no vés vut di vigni plui. Ma eco che t'un mès di mai 'a rimbomba ta grotta da aganis un sdrondenà, un rimitùr, un batibui. Catinuta che duar sul grin da agana, 'a peta s'ciassòns, e la rigina da aganis a gi sofla ta orelis e gi dis: « Jé la vuera che mazzarà la gialinata coi doi bècs ».

E i sdrondenòns e i tons a' no finivin atri; un grun di mès a' passin e anciamò al ciadaldià a no 'l à 'na fin. Ma una di di novembar la rigina da aganis 'a jeva via li mans che veva poiàt sun Catinuta, lis alza tre voltis e 'a dis: « Ciala, Catinuta ».

E alora l'ànima di Catinuta à vidùt una maravea che je no si veva mai immaginàt compagna. Gi pareva che duc' a' fossin doventàz maz avual dal gran plasé: sun duti li monz da pàtria al vongolava 'l tricolor, come che veva urùt je, e jù da monz a' corevin jù cidulis grandononis e duc' a' sberlavin un non: « Itàlia, Itàlia... ». E li cidulis vignivin jù jù, butànt falis'cis e lavin fintinamai tal mar, e dut al mar al lusiva, e duta la tiara a lusiva dal gran sflandór...

Catinuta, dopo un pu di timp 'a ciala la agana e gi dis un pinsir che veva vut di viva: « Cumò che li nazions a' stan tai so cunfins, a no saràn plui vueris, nomo?... E podaràn jessi duc' fradis e si oraràn ben, amo?... ».

Ma la rigina da aganis che saveva dut, 'a no à urùt rispùndigi. E la buna Catinuta, ància sot tiara, à sintùt dolór.

Ma una di la agana 'a dismòf la Catinuta e gi dis: « Ciala ».

E a Catinuta gi pâr di viodi la ciasa là che era nassuda, là che veva tant strusiat e fat dal ben; ma gi pâr che sedi gambiada e fata come una di ches glisutis antighis tal miez dai ciamps che parin cris-sudis sù da tiara. E tal miez da so ciasa a viot come un'ancona e drenti alc che 'l us. 'A ciala fis e viot dissegnada cun quattri pineladis una figura di fèmina che gi samea tant.

E po dopo a viot vignì jù da culinis e sù da planura, par duc' i trois, par duti li stradis tanta int e intona. E duc' a' si metin a ciaminà come in purzission, e i umins a' vevin al ciapiel in man e li fèminis li mans incrosadis. E duc' passavin denànt da so ciasa e disevin:

« Benedeta tu fra duti li fèminis fur-

lanis: tu tu às uruti ben ai pùars, tu tu às uruti ben a la tiara, tu tu às uruti ben a l'Itàlia.

« Come la Madona dai siet dolórs, tu tu vevis la spina tal cur, e tu tasevis, e tu ses stada simpri buna cun duc'.

« Tu tu às vidùt i nestris dolórs e li nestris miseris e tu às dit peraulis di cun-fuart par noatris pùars bandonàz.

« Tu tu nus às insegnàt a oré ben e a fâ simpri dal ben, tu nus às insegnàt a lavorá e a no avilisi mai, tu nus às insegnàt a jessi contènz dal nestri stât.

« Benedeta tu, o santa da nestra tiara; ten li to mans benedetis su duta la nestra int par che duc' a' si vuelin ben e vivin in pàs ».

NOTE

Premetto che tutta la mia fiaba è un lavoro musivo, in cui il ritratto della Percoto, donna e scrittrice, è composto con particolari tolti dalle novelle e dai raccontini e dalle lettere sue o da osservazioni di studiosi suoi amici e di critici in genere. Ho fuso in un quadro, in apparenza, soltanto fantastico, in realtà, con sfondo e tratti rigorosamente fedeli alla verità storica, tutti quegli elementi che meglio potevano ridare la fisionomia di questa friulana, quale si presenta al mio cervello. Chi conobbe la contessa molto da vicino, dopo aver udita la mia fiaba, mi assicurò che avevo intuito perfettamente il suo animo. La commozione sincera destata da questo mio racconto in quanti erano presenti alla lettura in Soleschiano il 3 settembre mi convinse che in questo mio lavoro c'era qualche cosa di buono, e perciò acconsentii che si pubblicasse.

Le poche note le aggiunsi per chiarire, a chi non conosce affatto o poco la vita e l'opera della Percoto, alcuni accenni alquanto velati.

A una domanda che tutti faranno, chi cioè fosse il primo amore della giovinetta Caterina, nessuno può rispondere, perchè nessuno lo seppe. Se è lecito fare una deduzione dalla "S'ciarnote", potrebbe essere stato un ebreo. Più tardi, il Dall'Ongaro le fu « caro amico e fratello », di cui essa si dice « affettuosa sorella ». Una seppur momentanea ripresa del suo mal d'amore provocata da questa stretta amicizia, si sarebbe tentati di ammettere attribuendo a lei un passo della tanto importante e significativa "S'ciarnote": "Un uomo che io non avevo cercato, venne su' miei passi, turbò la calma che con tanta fatica avevo riacquisito, distrusse i miei sogni e mi precipitò di nuovo nelle lagrime..." — I parenti della contessa sono tutti convinti che il Dall'Ongaro fosse, almeno per un certo periodo, realmente il secondo amore della sua vita.

nassuda: 19 febbraio 1812, all'epoca della massima potenza di Napoleone, idolatrato anche in Friuli.

una fan tramenda: l'anno della fame è il (1816-) 1817.

al pais là che era nassuda: San Lorenzo di Soleschiano, frazione del comune di Manzano.

doi fluns granc: Torre (la Tor) col Natison (Nadison).

una grotta: alludo alla grotta "des aganis", (di Borgnano, in quel di Cormons), di cui tratta una bella novellina della Percoto.

una biela fantata: la regina delle «acquane» (da me creata) ha tutti gli attributi per essere simbolo della terra nostrana. Le « aganis » sono una specie di ninfe friulane.

in zitàt: Udine.

à bandonàt la zitàt: nel 1829.

tre libris: la Sacra Scrittura; Virgilio (Bucoliche); Dante (Divina Commedia).

la fraile Cati: la voce "fraile", dal ted. "fräulein", (Fräulein), secondo me (v. Forum Julii II)

d'indubbia importazione goriziana, significa « signorina nobile » (come nel medio evo); oggi sta scomparendo, dopo aver assunto il significato burlesco di « zitellona ».

la stica: è il ballo delle "acquane", col ritmo espresso nei versi.
al licaf: voce d'origine bavaro-alpina (che noi poi prestammo agli sloveni). Significa comunemente la merenda che si fa quando è messo il tetto a un nuovo edificio. Nella novella della Percoto invece è il banchetto (annuale) per festeggiare il raccolto.

una fuartezza: Palmanova.

peraojata t'un brut lengaz: kruha (pane, in schiavonesco).

scolta che vós...: Francesco Dall'Ongaro (1808-78).

una zitât sul mar: Trieste.

falis' cis: alludo alla « Favilla », il nobile periodico triestino degli anni 1836-1846, con cui i più eletti spiriti delle nostre regioni alimentarono l'amore per l'Italia, non con lo spirito (austriaco) di D. Rossetti, ma con la visione chiara della necessaria unione di Trieste e della regione giulia all'Italia completamente unita nei suoi confini naturali. Trieste, che ha un monumento a R. e una via R., quando si ricorderà del debito di riconoscenza che ha verso quell'eletto manipolo di precursori puri e sinceri dell'irredentismo giuliano che, nel periodo prequarantottesco, onorarono con le loro luminose idealità la bigia città di commercianti?!

à dissegnât ecc. ecc.: è una parafrasi dell'iscrizione dettata dal chiar.mo Comm. Dott. GUALTIERO VALENTINIS, murata sulla casa della Percoto a San Lorenzo:

CATERINA PERCOTO

QUI APRÌ E CHIUSE GLI OCCHI PENSOSI

QUI SCRISSE I SOAVI RACCONTI

NEI QUALI

COME IN LIMPIDE ACQUE

SI SPECCHIA

IL DOLCE FRIULI

un vieli cun t'una barba lùgia: il dalmata Niccolò Tommaseo, a Venezia; fu il T. che scrisse la prefazione alla I edizione in un volume delle novelle della Percoto (Firenze 1858).

recdm: alludo al periodico «La Ricamatrice», di cui la Percoto fu collaboratrice e in cui pubblicò una parte dei «Raccontini». (I «Dieci Raccontini», dell'edizione triestina del 1868, sono tutti contenuti nei «Ventisei racconti vecchi e nuovi», Milano, 1878).

la Gigitata ecc. ecc.: i cognomi di queste ragazze li trovi nel 26° dei racconti «Orazio».

Checo: Francesco Dall'Ongaro; *Pacifico*: Pacifico Valussi.

la à onorada: fra altro, la P. fu nominata «Ispettrice degli Educandati delle Provincie Venete».

diviars ains fa: cioè trentacinque; la notte dal 14 al 15 agosto 1857.

in t'una zitât: Udine. È storico che quasi nessuna signora udinese prese parte ai funerali della P.

cidulis: è il titolo d'una lunga novella della P. La voce carnica significa quelle rotelle di abete che si lanciano accese giù dai monti in onore delle belle del paese, gridandone il nome, con accompagnamento di spari.

